


主編 李勇先 王強

日本藏山海經穆天子傳珍本匯刊

11



四川大學出版社

日本藏漢籍地理文獻珍本叢書

主編 李勇先 王強



四川大學出版社

日本藏山海經穆天子傳珍本匯刊

第十一冊

山海經地理今釋（晉）郭璞傳（清）吳承志纂（民國）劉承幹校

民國十一年南林劉氏求恕齋刻本……………

山海經地理今釋

壬戌閏五月

山海經地理今釋

俞鍾穎署



南林
劉氏
求恕
齋刊

山海經地理今釋序

國朝治山海經者太倉畢氏校本爲最善棲霞郝氏繼之阮文達稱其精而不鑿博而不濫蓋此經讀家至稀楊慎氏注蹈虛而不徵實吳任臣氏廣注汎引羣籍尤踳駁不純畢郝二家出而篇第釐正事物昭晰讀者不敢目爲閎誕迂誇奇恠俶儻之言矣後百餘年而錢塘祁甫吳先生乃顓精以治此經尋山脈川用今地準古起自域中遠暨海表遂使聖作明述之鉅編閱數千年而豁然大通上循神禹之蹟下切于當世之務其有功此經偉矣哉吳丈補松與先生訂道義文字交者四十

年先生卒丈亟求其遺書丐富陽朱眉山平陽陳篠垞
卽其家獲手稿盈尺捆載至杭州丈則大喜首取山海
經注理董之顧原稿闕南山經中山經亦未完具馳書
平陽百計求之不可得先生爲此注在丙申丁酉間晚
歲目管其卒也嗣子幼懵不知書遺稿散亡滋可痛也
吳丈校寫竟釐爲六卷楊夔定名曰山海經地理今釋
以授承幹讀之自西山經以下至於荒經粲然大備蔚
成巨觀雖有闕佚其懃懃纂述之心殆不可負承幹不
敏竊窺先生著書苦心其攷釋山川地理凡後人不得
其解者每原於本經文字之誤冥心孤往以推究致誤

之繇於編次之殽亂傳寫之譌奪字形之缺斂一爬
梳而抉摘之解釋疑滯若有神悟尋源于鄒書取證於
酈注旁及於金石文字多出畢氏校正郝氏訂譌之外
先生覃精輿地之學采摭旣富攷覈尤審閒及於名物
訓詁而以釋地理爲主觀其上徐澂園尙書書固自言
之題曰地理今釋猶先生本旨也歟乎今之世距先生
成書時二十餘年矣衡流方羊坤軸岬嶺芒芒禹蹟無
復夷庚古籍充棟視若芻狗有甚于酈善長所歎編葦
稀絕者其庶幾有達觀博物之客耽讀而縛繹之如郭
景純所期望者乎辛酉之夏天貺節吳興劉承幹



山海經地理今釋卷一

求恕齋叢書

錢塘吳承志纂

吳興劉承幹校

西山經上

西山經華山之首曰錢來之山

蒙按錢來之山蓋今陝西雒南縣北黃龍山其山支幹連接太華之山故以爲首也下經方向多後人改亂不可盡據說具次三經不周之山下

西四十五里曰松果之山灌水出焉北流注于渭

蒙按此經敘錢來之山東支松果之山蓋今河南閩

鄉縣西南秦山灌水今嵩谷河西北流入陝西潼關
廳境合潼河折北流入黃河經云注于渭古時此水
自廳南折西流至華陰縣及華州境合太華少華諸
山水始北入渭今流乃漢以後改易也酈道元水經
渭水篇注云渭水經新豐縣右合漕渠漢大司農鄭
當時所開也其渠自昆明池南傍山原東至于河今
無水是渭南之水多爲鄭渠所亂河水篇注云厯船
司空與渭水會南流潼激關山因謂之潼關灌水注
之水出松果之山北流逕通谷世亦謂之通谷水東
北注于河則渠絕水亦移而東北矣畢云河渭之會

互受通稱詳此經起華山之首所敘之水自必以流注于渭者爲限不得旁及于河且今二華山俱有水入渭經皆不具下流亦必納以入渭之長川不可以今迹言之也太平寰宇記華陰縣松果山在縣東南二十七里彼松果秦山迤西之支峰顧氏祖禹讀史方輿紀要潼谷水流逕松果山下潼谷水卽嵩谷水其山在水下流非所出之正峰

又西六十里曰太華之山

蒙按太華之山在今陝西華陰縣南距嵩谷河源山約六十里

又西八十里曰小華之山

蒙按此經敘松果之山西幹八十里承松果之山言也小華之山今華州南少華山

又西八十里曰符禺之山 符禺之水出焉而北流注于渭

蒙按符禺之山今渭南縣西南藍田縣北分水嶺亦曰橫嶺距少華山八十里符禺之水今冷水河北流至臨潼縣零口鎮入渭水經渭水篇注冷水出肺浮山蓋麗山連麓而異名也北會三川統歸一壑歷陰槃新豐兩原之間北流注于渭肺浮太平寰宇記作

浮肺注文誤倒浮肺卽符禺符浮聲近禺與肺亦音轉而異也麗山記作驪山宋敏求長安志云驪戎來居此山故以名古時兩山蓋通名符禺無殊別之目其水亦通目爲符禺不別爲名注於沙溝水下別云卽符禺之水也南出符禺之山北流注于渭以沙溝水所出之山爲符禺山誤沙溝水在定城泥泉水東定城去潼關三十里其地在太華山東其水所出之山卽秦山支峰與經綴在小華山之次全不相應記闕符禺水不具繫符禺山於華州鄭縣下云在西南一百里高一百丈鄭縣今華州治西南一百里當入

藍田縣界注說不同雍州昭應縣下云驪山在縣東南卽藍田山也百丈水卽冷水之別名驪山爲藍田迤北之山百丈水以出百丈之山得名是所謂符禺山者卽冷水所出之山鄭縣下又云英山在西南一百三十里竹山在西南一百四十里所綴皆此經之山宋華州境北跨渭水兼有下邽東盡潼關縱橫南北止一百三十五里東西一百四十五里諸山俱應折入他州不得在鄭縣境地之中記并繫之者當時采纂以華山記爲據華山記中有數山其文以鄭縣標具里數不著所在之縣故竝錄於此也竹山與注